



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
**PANELI ZGJEDHOR PËR ANKESA DHE PARASHTRESA**  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.160/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët; Hajriz Hoti kryesues, Ramush Bardiqi, dhe Bujar Muzaqi anëtarë, duke vendosur përkitazi me ankesën e Subjektit Politik, Lidhja Lëvizja Vetëvendosje (LVV), me seli në Prishtinë, të paraqitur kundër Subjektit Politik, Demokracia Serbe (DS), me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë Fushatës Zgjedhore, për Zgjedhjet e Përgjithshme për Kuvendin e Republikës së Kosovës, që do të mbahen më datë 09.02.2025, në seancën e panelit të mbajtur më datë; 25.01.2025, merr këtë,

V E N D I M

- I. Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.160/2025, e datë;23.01.2025.
- II. Subjektit Politik Demokracia Serbe (DS), me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjobë në lartësi prej 3.500.00, (tremijë e pesëqind) Euro.
- III. Detyrohet Subjektit Politik Demokracia Serbe (DS) me seli në Mitrovicën e Veriut, që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datë; 23.01.2025, PZAP-i, ka pranuar ankesën A.nr.160/2025, nga subjekti politik Lëvizja Vetëvendosje, të paraqitur kundër subjektit politik, Demokracia Serbe (DS), me seli në Mitrovicë të Veriut, në të cilën pretendon se aktivistët e Lëvizjes Vetëvendosje në Mitrovicën e Veriut kanë identifikuar banerë/poster të vendosur në hapësirat/rrugët publike, të kandidatit për deputet të subjektit politik, Demokracia Serbe (DS), Aleksander Arsinijovic, konkretisht në sheshin kryesor "Kral Petra", në Mitrovicën e Veriut, dhe se më të njëjtin veprim kandidati dhe subjekti politik, Demokracia Serbe (DS), ka bërë shkelje të nenit 34, paragrafi 1, nenparagrafi 1.2 të Ligjit Nr.08/L-228 për Zgjedhjet e Përgjithshme në Republikën e Kosovës LZP, konkretisht neni 34, paragrafi 1 nën paragrafi 1.2 i LZP-së parasheh: "*Gjatë periudhës së fushatës, subjekti politik, mbështetësit ose kandidatët e tij, ndalohen nga bërja e ndonjërisë si në vijim:1.2 vendosja e njoftimeve, pllakateve dhe posterëve, ose përndryshe,*

*vendosja e emrave të tyre ose e sloganeve në lidhje me fushatën zgjedhore brenda ose jashtë ndërtesave publike ose godinave, në apo mbi rrugët publike, në shenjat publike të trafikut, brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombëtare, ose brenda ose në hapësirat private pa lejen e pronarëve ose shfrytëzuesve.”* Parashtruesi i ankesës ka theksuar se për më shumë çështje të natyrës së njëjte, tashmë PZAP, ka praktikë të vendosjes përmes vendimit Anr.79/2025, të datës;22.01.2025, dhe vendime tjera përkatëse. Si provë parashtruesi i ankesës ka bashkangjitur fotografi që dëshmon vendosjen e banerit/posterit në kundërshtim me LZP.

Më datë;24.01.2025, PZAP-i, e njoftoi subjektin politik ,Demokracia Serbe (DS), për ankesën e paraqitur kundër tyre, duke i dërguar kërkesë për përgjigje deri me datë;25.01.2025, në ora 09:00.

Në përgjigje në ankesë të paraqitur me datë;25.01.2025, subjekti politik, Demokracia Serbe, ka kundërshtuar ankesën e paraqitur nga subjekti politik Lëvizja Vetëvendosje duke theksuar se Demokracia Serbe ka marr pëlqim nga pronarët e ndërtesave dhe strukturave për të vendosur posterat në ndërtesat e tyre dhe në këtë drejtim Demokracia Serbe nuk ka shkelur nenin që pretendon Lëvizja Vetëvendosje, përkatësisht, nenin 34, paragrafi 1, nën paragrafi 1.2 të Ligjit për Zgjedhjet e Përgjithshme. Po ashtu në përgjigje në ankesë subjekti politik Demokracia Serbe ka theksuar se nëse është e nevojshme Demokracia Serbe do ti sigurojë PZAP-së numrat e telefonit të përfaqësuesve të këshillit të banorëve për të gjitha ndërtesat në të cilat kemi vendosur posterat në rrugët e përmendura në Mitrovicën e Veriut në momentin që Lëvizja Vetëvendosje na ofron adresat e sakta të ndërtesave për të cilat u ankua. Në përgjigje ne ankesë theksohet se Demokracia Serbe nuk ka shkelur nenin 7, paragrafi 2.6 dhe ka marr pëlqimin e përfaqësuesve të këshillit të banorëve në të gjitha rrugët ku kemi ngjitur materiale promovuese, gjithashtu në ankesën e paraqitur nga Lëvizja Vetëvendosje nuk janë të qarta lokacionet e sakta të objekteve, përkatësisht numrat e të gjitha objekteve dhe ndërtesave që Lëvizjes Vetëvendosje konsideron se janë ngjitur në mënyrë jo të rregullt posterat e subjektit tonë politik. Subjekti politik Demokracia Serbe lidhur me ankesën e paraqitur ndaj tyre pretendon se kanë dyshime se policët në rroba civile fotografuan posterët me 23 Janar 2025, kjo si formë e presionit politik dhe dekurajimit të kandidatëve të subjektit tonë politik për të konkurruar në garën zgjedhore.

Paneli, pasi që shqyrtoj dhe vlerësoi ankesën, vëren se ankesa është e bazuar.

Paneli pas shikimit të shkresave të lëndës dhe përgjigjes në ankesë të paraqitur nga subjekti politik Demokracia Serbe, vlerësoj se pretendimet e Subjektit Politik LVV, janë të qëndrueshme dhe të bazuara, dhe si të tilla i aprovoj, për faktin se veprimet e përshkruara në ankesë paraqesin shkelje nga ana e subjektit politik Demokracia Serbe, ngase e njëjta ka vendosur posterët në hapësirat publike, përkatësisht në ndërtesat në sheshin kryesor “Kral Petra” në Mitrovicën e Veriut, me më të cilat iu bënë thirrje qytetarëve për votimin e subjektit politik, Demokracia Serbe për procesin zgjedhor që do të mbahet me datë;09.02.2025, ku me këto veprime ka shkelur dispozitat e nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave*

*të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve.”*

Paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes, dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se ky veprim i tyre përbën shkelje për herë të parë të legjislacionit zgjedhor. Po ashtu, Subjekti Politik, Demokracia Serbe, ka qenë i njoftuar me obligimet dhe përgjegjësit gjatë procesit të fushatës zgjedhore. prandaj vendosja e posterëve-njoftimeve të subjektit të tyre politik për fushatë zgjedhore në objekte publike gjegjësisht në dyert e ndërtesave në Mitrovicën e Veriut, përbën shkelje të legjislacionit zgjedhor, dhe të njëjta shkelje janë sanksionuar me dispozitat ligjore të LZP-së.

Subjekti Politik, Demokracia Serbe në përgjigje në ankesë ka kundërshtuar ankesën e parashtruesit duke theksuar se posteret e kandidatit nga radhët Subjekti Politik, Demokracia Serbe, janë vendosur me pëlqim të banorëve të objekteve banesore të cilët kanë dhënë pëlqimin paraprak për vendosjen e tyre. Për Panelin këto pretendime janë të pa bazuar, për faktin se posteret janë vendosur në hapësirën e jashtme të objekteve të banimit kolektiv, dhe se për këtë rast duhet leje e veçantë, përkatësisht, pëlqim nga Drejtoria përkatëse të lëshuar nga Komuna e Mitrovicës së Veriut. Kurse në rastet kur objektet janë private, atëherë duhet të sigurohet pëlqimi me shkrim nga pronari-shfrytëzuesi i objektit. Paneli po ashtu vlerësoi edhe pretendimet tjera nga përgjigja në ankesë, mirëpo të njëjtat i vlerësoi si të pa bazuara, për faktin se të njëjtat nuk janë provuar me asnjë prove të vetme.

Prandaj, duke u mbështetur në nenin 117.3 të LZP-së ku përcaktohet se “vendosja për ankesat nga PZAP-ja mbështetet në dëshmi të qarta dhe bindëse”, Paneli vlerësoj se pretendimet e tilla të palës ankuese janë të qëndrueshme dhe si të tilla i pranoi, sepse kjo shkelje ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi si të bazuar.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1, dhe neni 120 paragrafi 1 nen parafi 1.3, të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtrësia  
Anr.160/2025, datë:25.01.2025

Kryesues i Paneli  
Hajriz Hoti



*Këshilla Juridike: Kundër këtij vendimi nuk është e lejuar ankesa sipas nenit 118 paragrafi 4 të LZP-së.*